



Al coro Contarini
ed alla sua maestra: Monica Ferrini

Musica! Maestra.

Quand ca sera znì (un burdèl)
Mi pé um lizeva al zirudèll.
Agl'era d'Ugo e Masì Piazza
E a sintili am gudeva la faza.
E sarà par quel, che dop acse tant temp
Um pies d'scrivar i fètt dla zent
Mitend in rèma tot al paroal
D'è nost dialett, e rumagnoal.
Acsé am so tolt la briga, cari coristi,
d'scrivar do righ par no, "artisti"
che coma i cavalir seza macia né paura
i s'è buté deta st'aventura
d'furmé un cor, d'vos sgafi o pera,
e d'canté sempar, matèna e sera.
S'av cardiv! E nostar l'è un cor seri
no d'qui chi fa tot ch'al tiriteri!
A se boh d'canté a tre o quatar vos
nenc se a sé sol trè ghètt in cros.
Me a crid che a ste pont d'la zirudèla
e sea mei cha scurta la budèla
e ch'av conta in ti particuler
quel ch'e zuzed i mircul, tott al ser.
Dop un quert d'ora d'gurghegg e vucalez
a sé pront par canté i nostra pezz
che a no us pies d'canté in ingles,
mo us va bèn nenc latè o franzes.
An so sicur, mo a crid che s'a pruvè
nenc e tedesc us vega a fasulè!
A forza d'prov agl'ha imparé nenc al murai
la canzò cla fa: « as taim gos bai »!
Mo e pèzz piò bell in ste mument
l'è la "fanfara de printemp".
E repertori un fnes acqué
nenc Vienna, Vienna us po' canté
cun i su "mille piacer"

ch'it fa gudé in te "mister".
La nostra maestra, Monica, pianesta,
lè la direttrice, la regista
che cun pazezia e cun custanza
l'as ha insigné nenc la "speranza"
che Rossini, cun la "Fed"
l'ha scrett par qui ch'in cred.
D'al tre vartò l'è arresta fura
la "carità", forse piò dura.
Quand che a sé puch la maestra l'é
avilida,
mo la sa fé bè, a fe da guida.
La su cros, no al capé bèn
le e schers nomar d'i suprèn!
Sol tre ragazi acsé impignedi
che quand ch'al canta al pé sbudledi.
E pu i cuntrelt, al vos de mèzz.
Par lò, l'è sempar mei pruver e pezz
ch'un selta fura a mitè stré
una quelca nota cl'an sta bè bè!
U'ie pù i'oman chi canta da tenor.
Lò, us sa, i'à la musica in te cor
e sa mitè so una canta nova
e basta un sguerd, senza una prova.
I bèss non sempar i'è all'altezza
d'imparé la pert cun grand sciultezza,
mo quand che a forza d'batar i la sa
stà sicur che in sbagliarà!
Nemc par st'ann la scola l'è finida
e e nostar cor l'ha zughé la su partida.
E mi auguri par tott quent
l'è d'truves in utobar in piò tent.
E a ste pont, la musica piò bèla
l'è d'dé un tai a sta longa zirudèla.



Luigi Rusticali
Russi, 7 giugno 2001